



Aningaasanut Nunanullu Allanut Naalakkersuisoq

TUAVIORTOQ

Aningaasaqarnermut Ataatsimiititaliap suliaq nr. 01.31.06/09-00406 pillugu tallimanngornermi ulloq 20. februar 2009 aalajangiinera pillugu Naalakkersuisunut ilisimatit-sissut (Naalakkersuisut ulloq 15. februar 2009-mi ataatsimiinneranni imm. 2a)

Arctic Green Food A/S-imik (AGF) kiffartuussinissamik isumaqatigiissutaagallartumik akuersissutiginninnissaq

Naalakkersuisut **inassutigaaat,**

- AGF-imik kiffartuussinissamik qaammatini pingasuni isumaqatigiissutaagal-lartoq, 3.860.225 kr.-inik naleqartoq konto pingarnermit 50.01.18-imit, Ingerlatsinissamut isumaqatigiissutinut tunngasumit, aningaasalerneqartoq i-lanngussat ilanngullugit Aningaasaqarnermut Ataatsimiititaliamit akuerine-qassasoq.

Aningaasaqarnermut Ataatsimiititaliap oqaaseqaatai

Arctic Green Foodimut (AGF) kiffartuussinissamik isumaqatigiissutip qaammatini pingasuni atuuttussap Aningaasaqarnermut Ataatsimiititaliamit akuersissutigineqarnissaa Naalakkersuisut suliami matumani qinnutigaat.

1. Qaammatini pingasuni kiffartuussinissamik isumaqatigiissutaagallartooq

Piffissami aalajangersimasumi kiffartuussinissamik isumaqatigiissutip 3,86 mio. kr.-inik aningaasartallip akuerineqarnissaa Naalakkersuisut qinnutigaat. Aningaasartuutissat taakku kontomi pingarnermi 50.01.18-imi, tunisassiorfinnik ingerlatsinissamik isumaqatigiissutinut tunngasumi, aningaasaliissutaasut 2009-mut tamarmiusumut 8 mio. kr.-iusut iluanni aningaasartuutigineqassapput. Kiffartuussinissamik isumaqatigiissutip matumani pineqartup akuerineqarnerani kontomi pingarnermi 4,14 mio. kr.-it sinnerutissapput. Taamaalilluni kiffartuussinissamik isumaqatigiissut matumani pineqartoq akuerineqarpat kontomi pingarnermi 50.01.18-imi aningaasaliissutit killilerujussuit sinnerutissasut ataatsimiititaliap oqaatigissavaa. 4,14 mio. kr.-illi immikkoortinneqareersut saniatigut AGF-imut kiffartuussinissamik isumaqatigiissutip 2009-p sinnerani akilerneqarnissaanut matussutissanik ilassutitut aningaasaliissuteqarnissamik kingusinnerusukkut qinnuteqartoqarsinnaanngimmat Aningaasaqarnermut Ataatsimiititaliap isumaqatigiittup erseqqissassavaa. Taamaalilluni 2009-p sinnerani AGF-imut kiffartuussinissamik isumaqatigiissuteqaqqinnissamut aningaasartuutit tamarmiusut 4,14 mio. kr.-init matussuserneqartussaapput.

Aningaasanut inatsit ulloq 15. november 2008-mi akuersissutigineqarmalli Naalakkersuisut AGF-ilu kiffartuussinissamik isumaqatigiissuteqarnissamut periarfissaqarsimapput. Tamanna tunngavigalugu 2009-mut tamarmut atuuttussamik isumaqatigiissuteqartoqannginnera naapertuutinngilluinnartutut Aningaasaqarnermut Ataatsimiititaliamit isigineqarpoq. 2009-p

sinneranut kiffartuussinissamik isumaqatigiissummik isumaqatigiinniarnit kinguarsaanertaqanngitsumik aallartinneqarnissaat Aningaasaqarnermut Ataatsimiititaliap **kaammattuutigaa**. Isumaqatigiinniarnep sapinngisamik piaartumik ingerlanneqarnissaa Naalakkersuisunit qulakkeerneqassasoq ataatsimiititaliamit naatsorsuutigineqarpoq, taamaaliornikkut kiffartuussinissamik isumaqatigiissutip matumani pineqartup atorunnaarneranit atuuttussanngorlugu kiffartuussinissamik isumaqatigiissut tulleg isumaqatigiissutigineqarsinnaaqullugu.

2. Kiffartuussinissamik isumaqatigiissuteqarnermi siunertaq?

Kiffartuussinissamik isumaqatigiissutissatut siunnersuutigineqartup siunertaata ersernerlunne-ra ajornartorsiutitaqartutut Aningaasaqarnermut Ataatsimiititaliamit isigineqarpoq. AGF-ip ingerlaannarnissaata qulakkeerneqarnissaa siunertaralugu kiffartuussinissamik isumaqatigiis-suteqarnissaq Naalakkersuisut anguniarpaa? Akerlianilluunniit najukkani suliffissaqartitsinis-saq tunitsivissaqartitsinissarlugu Naalakkersuisunit qulakkeerniarneqarpat? Naalakkersuisut isumaqatigiissuteqarnissamut tunngavigisaat ersernerlummata kiffartuussinissamik isumaqa-tigiissummi anguniakkat soorunami aamma ersernerlupput. Taamaalilluni kiffartuussinissa-mik nutaamik isumaqatigiissummut taarsiullugu sorpiaat allat qinigassaanersut nalilerumi-naappoq. Tamanna isummernissamut tunngavissiami ersarissumik amigaataavoq. Kiffartuus-sinissamik isumaqatigiissutip siunertarisaa ersarissumik nassuiaateqarfigissagaat aammalu kiffartuussinissamik nutaamik isumaqatigiissummut taarsiullugu periarfissat allat AGF-imut (allanulluunniit) kiffartuussinissamik isumaqatigiissutip tulluuttup akuersissutigineqarnissaa-nik Naalakkersuisut qinnuteqaamminni saqqummiutissagaat Aningaasaqarnermut Ataatsimii-titaliap isumaqatigiittup kaammattuutigissavaa. Suliffissanik aamma/imaluunniit tunitsivis-sanik qulakkeerinissamut kommunit aningaasanik taakkuninnga atuisinnaatinnissaat siunerta-ralugu kiffartuussinissamik isumaqatigiissutinut aningaasat kommuninut nuunneqarsinnaane-rat ataatsimiititaliamit siusinnerusukkut siunnersuutigineqarsimammat Aningaasaqarnermut Ataatsimiititaliap eqqaasitsissutigissavaa. Taamaattumik AGF-imut isumaqatigiissutip Namminersornerullutik Oqartussanit kommuninut tunniunneqarsinnaanera pillugu piumasa-qaat kiffartuussinissamik isumaqatigiissummi tulluuttumi ilannguteqqinneqassaaq.

Suleqatigiissitamat AGF-imut isumaqatiginninniartumut Naalakkersuisunit suliakkiissutip nuutinneranik pissarsinissani Aningaasaqarnermut Ataatsimiititaliap **qinnutigissavaa**. Aammalu suleqatigiissitap sulineranut atatillugu Naalakkersuisunit najoqqutassaritat pillugit ilisimatitsissuteqarfigineqarnissani ataatsimiititaliap kissaatigaa. Suleqatigiissitap 2009-p sinnerani kiffartuussinissamik isumaqatigiissummik suliaqarnerani suliakkiissut najoqqutassiallu atuutiinnassanersut tassunga ilanngullugu paasissutissiissutigeqquneqarpoq.

3. AGF-ip sulianik ingerlatsinera pissusissamisoorpa?

Suliassat AGF-imit isumagineqartut aktiaateqarluni ingerlatseqatigiiffimmit namminersortu-mit ingerlatiinnarneqarnissaat naapertuuttuunersoq isumaliutigineqartariaqartoq Aningaasa-qarnermut Ataatsimiititaliap isumaqarpoq. AGF-ip tunitsivii ukiorpassuarni amigartoorute-qarfiusarsimanngikkunik amigaateqarfiujuaannarput. Akerlianik aktiaateqarluni ingerlatseqa-tigiiffik iluanaaruteqarniartussaavoq. Taamaattumik AGF-imi nalilittut taaneqarsinnaasutuat aktiaateqarluni ingerlatseqatigiiffimmut namminersortumut iluanaarniarluni ingerlatsisumut soqutigineqarsinnaasut tassaagunarput pisortat kiffartuussinissamik isumaqatigiissutinut akiliutaat. Kiffartuussinissamut isumaqatigiissutinut akiliutit annikillisinneqartillugit atorun-naarsinneqartillugilluunniit ingerlatat amigartooruteqarfiusut ikilisarnissaat ingerlatseqatigiif-fiup iluanaarniarluni ingerlatsisuusup anguniassavaa, tamannalu tunitsivinnik matusinikkut ajornannginnerpaamik (malunnarnerpaamillu) pisinnaalluni. Nunaqarfinilu tunitsiviit ingerlatiinnarnissaasa naalakkersuinikkut ingerlataqartunit iliuuseqarfiginissaat mianernartin-neqarsorinarmat tunitsiveqarnermik suliassap imminut akilersinnaanngitsup iluanaarniarluni ingerlatsisumut AGF A/S-itut ittumut tunniunneratigut Namminersornerullutik Oqartussat imminut imaannaanngitsumik inissipput. Apeqqut tamanna Naalakkersuisunit sukumiisumik

isumaliutigineqassasoq Aningaasaqarnermut Ataatsimiititaliap isumaqatigiittup kaammattuutigaa. Tunngaviusumik apeqquumi tamatumani Naalakkersuisut naliliineri misissuinerilu pillugit kingusinnerpaamik nunaqarfinni tunitsiviit pillugit kiffartuussinissamik isumaqatigiissutip akuerineqarnissaanik qinnuteqaammut tullermut atatillugu ilisimatinneqarnissani ataatsimiititaliap kissaatigaa.

Tamatuma saniatigut AGF aningaasaqarneq eqqarsaatigalugu naapertuuttumik ingerlanneqarsorinangitsoq ataatsimiititaliap isumaqarpoq. Ingerlatseqatigiiffiup allaffissornermut akissarsianullu aningaasartuutit nalunaarsugai annertoorujussuupput, taamaattumillu ingerlatseqatigiiffimmi aningaasartuutit taama qaffasitsigisut ingerlatiinnerneqarnissaat siunertaralugu pisortat kiffartuussinissamik isumaqatigiissutinut akiliutaat tunniunneqarneq ajornata ingerlatseqatigiiffimmut erseqqissaatigineqartariaqarpoq. Saarullit akiisa apparitornerat ingerlatseqatigiiffiup aningaasaqarnerata ingerlanerliorneranut nassuiaatigissallugu naammangitsoq ataatsimiititaliap isumaqarpoq, tassami tunisassiat allat AGF-imit pisiarineqartartut akii suli ajorisassaangilluinnarmata.

4. Kiffartuussinissamik isumaqatigiissummut atatillugu AGF-imut akiliutit pisortanut qanoq iluaqutaappat?

Kiffartuussinissamik isumaqatigiissummut atatillugu AGF-imut akiliutit inuiaqatigiinnut iluaqutissarsiffiusarnerannut takussutissiaq AGF-mit suliarineqartoq Aningaasaqarnermut Ataatsimiititaliap tiguaa. Aammattaaq takussutissiaq Naalakkersuisut qinnuteqaataannut oqaaseqaatitalernagu ilanngussatut ilanngunneqarpoq. Missingersuutit naatsorsuinerillu takussutissiami saqqummiunneqartut tutsuiginassusiannik naliliinissamut ataatsimiititaliap periarfissaqanngilaq. Taamaattumik suliffiit, najukkani kaaviiartitat il.il. aqcutigalugit kiffartuussinissamik isumaqatigiissummut akiliutit pisortanut iluaqutaanerannik ataatsimut naliliissummik kingusinnerpaamik kiffartuussinissamik AGF-imut isumaqatigiissutit akuerineqarnissaa pillugu tullianik qinnuteqarnermut atatillugu Naalakkersuisut saqqummiussinissaat Aningaasaqarnermut Ataatsimiititaliamit isumaqatigiittumit kaammattuutigineqarpoq. Tamatuma saniatigut kiffartuussinissamik isumaqatigiissummut pisortat akiliutaanik ingerlatseqatigiiffiup atunerata AGF-ip ukiumoortumik nalunaarutaani immikkut sapinngisamillu annertunerpaamik naatsorsuutitigut nassuiaatigineqarnissaa kiffartuussinissamik isumaqatigiissummi tullermi piumasaqaataassasoq Aningaasaqarnermut Ataatsimiititaliap isumaqatigiittup kaammattuutigaa. Taamaaliornikkut naatsorsukkat saqqummiunneqartut kukkunerisuiusumit akuerisaanissaasa qulakkeerneqarnissaa ataatsimiititaliap kissaatigaa. Aammattaaq kiffartuussinissamik isumaqatigiissummut akiliutit assersuutigalugu suliffeqarfiup akileraarutinut akiitsuinut atornagit nunaqarfinni isumaqatigiissummi pineqartuni inuuniarnikkut atugassarititaasut pitsanngorsarneqarnerannut atorneqarnissaasa qulakkeerneqarnissaa ataatsimiititaliap kissaatigaa.

5. AGF-ip 2008-mi ukiumoortumik naatsorsuutai

Ukiut siuliini missingersuutit kisitsisitaat aallaavigalugit siumut naatsorsuinikkut missingersuutit kisitsisitaat ilanngussanngorlugit nassiunneqartut suliarineqarsimasorinarput. Taamatut naliliineq tamakkiisumik ilaannakortumilluunniit eqqorsimappat, tamanna annertuumik ajornartorsiutitaqassasoq ataatsimiititaliap isumaqarpoq. Imartunerusumik nutartigaasumillu aalajangiinissamut tunngavissaqarnissap qulakkeerneqarnissaa siunertaralugu 2008-mi ukiumoortumik naatsorsuutaagallartut Naalakkersuisut AGF-imut piniarsimasinnaagaluaaraat ataatsimiititaliap isumaqarpoq. Kiffartuussinissaq pillugu AGF-imut isumaqatigiissutissap tulliup suliarineqarnerani 2008-mi ukiumoortumik naatsorsuutit (naatsorsuutaagallarsinnaapput) kukkunerisuiusumit akuerisat ilanngunneqarnissaat Aningaasaqarnermut Ataatsimiititaliap isumaqatigiittup kaammattuutigaa.

6. AGF-ip Daycatch A/S-imik suleqateqarnera

Ilisimasat naapertorlugit AGF-ip danskit ingerlatseqatigiiffiat Daycatch A/S suleqatigiinnis-samik isumaqatigiissuteqarfigaa. AGF-ip tuniniaanermik allaffeqarfiatut Daycatch ingerlasoq oqaatigineqarpoq. AGF-ip Daycatchimik suleqateqarnerata erseqqinnerusumik nassuiaatigineqarnissaa Aningaasaqarnermut Ataatsimiititaliamit kissaatigineqarpoq. Tassunga ilanngul-lugu makku paasissutissiissutigeqquneqarput:

- Ingerlatseqatigiiffiit taakku marluk ingerlatseqatigiiffinnilluunniit piginnittut aappaata siulersuisuni sinniisoqarpat? Taamaassimappat tamanna qanoq ingerlanneqarnerasoq paasissutissiissutigeqquneqarpoq.
- Daycatchip tuniniaanermi allaffeqarfittut atorneqarneranut taarsiullugu tunisat apeq-qutaatillugit akilerneqartartumik tuniniaasussamik isumaqatigiissuteqarnikkut AGF sipaaruteqarsinnaanersoq misissorneqarsimava?
- Nioqqutissanut sullississutinullu AGF-ip Daycatchillu akornanni niuerutigineqartunut naatsorsuutini takussutissaqarpa ingerlatseqatigiiffiit ataatsimoortumik ingerlatsine-ranni iluanaarutit ingerlatseqatigiiffiup aappaanit iluanaarutigineqartartussanngorlugit annaasallu ingerlatseqatigiiffiup aappaanut tuttartussanngorlugit inissiisoqarsimasoq? (Transfer pricing)
- AGF-ip Daycatchimut 2008-mi akiliutaat tamakkiisumik qanoq naleqarpat?

7. Kiffartuussinissamik AGF-imut isumaqatigiissutip pitsaassusiata inatsisilerinikkut qulakkeerneqarnera

Kiffartuussinissamik isumaqatigiissutip pitsaassusiata inatsisilerinikkut qulakkeerneqarsima-nera killeqartoq Aningaasaqarnermut Ataatsimiititaliamit paasineqarpoq. Isumaqatigiissut pisortat illua tungitut peqataaffigisaat taama iluseqartilluni naammagintartumik pitsaassuse-qartitsinissamik piunasaqaammut eqquutsitsinnginnera assorsuaq naapertuutinningsutut ataatsimiititaliamit isigineqarpoq. Kiffartuussinissamut isumaqatigiissutissatut missingiusiaq tulliuuttoq nassiuunneqannginnermini pitsaassusissaa qulakkeerniarlugu inatsisilerituumut piginnaaneqartumut isumaqatigiissusiortarnermillu ilisimasaqartumut nassiuunneqassasoq Aningaasaqarnermut Ataatsimiititaliap isumaqatigiittup inassutigissavaa.

Kiffartuussinissamik isumaqatigiissutip atsiorneqannginnerani amigaatit makku minnerpaa-mik iluarsineqarsimasariaqarput:

Immikkoortoq isumaqatigiissutip atuutilerneranut tunngasoq allanngortinneqassaaq, taamaa-lilluni isumaqatigiissut illuatungeriinnit tamanit atsiorneqareerpat isumaqatigiissut aatsaat atuuttussanngortinneqassalluni.

AGF-ip naammassisassaanut Namminersornerullutik Oqartussat akiliutaat § 2, imm. 1-imi innersuussutigineqarput. Naammassisassat taakku suunersut ersarissumik nassuiaatigineqas-sapput, tamatumani § 1, imm. 3 innersuussutigineqarsinnaalluni.

Naammassisassat naammassineqanngippata § 2, imm. 3-4-mi piunasaqaatinut innersuus-summik § 2, imm. 2 ilaneqassaaq.

§ 2, imm. 3-mi oqaaseqatigiit kingulliit ataqatigiinngimmata peerneqanngikkunik allanngor-tinneqassapput.

§ 3, imm. 4-mut innersuussut § 2, imm. 3-mi ilanngunneqassaaq, taamaalilluni § 3, imm. 4-mi aalajangersakkamik malinninnginneq AGF-imut akiliutinik unitsitsinikkut iliuseqarfigine-qarsinnaanngorlugu. Tamanna immikkut pingaaruteqartutut isigineqarpoq, kiffartuussinissar-mi pillugu suliffeqarfimmut isumaqatigiissummi piunasaqaat taassuma assinga AGF-ip nassuiaateqarnani eqquutsissimannngimmagu.

2009-p sinneranut kiffartuussinissamik isumaqatigiissut pillugu Namminersornerullutik Oqartussanik ingerlaannartumik kinguarsaaniarnartaqanngitsumillu AGF-ip isumaqatigiin-niarnissaanik aalajangersaasumik § 5-imi aalajangersakkamik ilanngussisoqassaaq.

Kiffartuussinissamik isumaqatigiissutip atsiorneqannginnerani amigaatit makku iluarsineqartariaqarput:

Qulequtaani oqaaseq “*utaqqiisaasumik*” atornagu “*piffissami killilimmi*” atorneqartariaqarpoq. Aamma taamaappoq § 5, imm. 1-imi.

Isumaqatigiissutip qaammatini pingasuni atuuttuunera isumaqatigiissummi ataasiaannarluni allassimasariaqarpoq. Tamanna isumaqatigiissutip qulequtaani imaluunniit aallarniummi allassimanani aalajangersakkami aalajangersimasumi nalunaarneqarpat eqqornerussaap.

“Qaammatini pingasuni” atuuttuunera qanorpiaq naatsorsorneqassanersoq § 1, imm. 1-imi erseqqissaatigineqarluarsinnaavoq.

Inuussutissarsiutigalu imaluunniit sunngiffimmi aalisartut piniartullu tunisisinnaanerart pineqarnersoq § 1, imm. 3-mi erseqqissarneqartariaqarpoq.

§ 1, imm. 5, ima oqaasertaleneqartariaqarpoq: ”Tunitsivinni tamani isumaqatigiissummi ilaatinneqartuni aningaasartuutitut ingerlataqassutsimullu AGF-ip uppersaasinnaanissaa piunasaqaataavoq.”

Immikkoortoq ima oqaasertalik § 3, imm. 1-imi ilanngunneqartariaqarpoq ”Tamanna tunitsivinnut ataasiakkaanut taamatullu tunitsivinnut tamanut tunngatillugu paasiuminartunngorlugu nassuiaatigineqassaaq”.

Isumaqatigiissummik malinninnginnermi kingunerititassat nalinginnaasumik sukaterneqarlutillu erseqqissarneqartariaqarput.

Aammattaaq immikkoortumi tulluuttumi oqaatigineqartut innersuussutigineqarput.

7.1. Tunitsiviit sorliit kiffartuussinissamik isumaqatigiissummi ilaatinneqarpat?

Tunitsiviit sorliit isumaqatigiissummut ilaatinneqarnersut kiffartuussinissamik isumaqatigiissutissatut missingiusiami § 1, imm. 2-mi allassimavoq aammalu ilanngussat assigiinnigitsut angusassanut missingersuutit qaammatikkaartumillu takussutissianik imallit isumaqatigiissutissatut missingiusiap naanerani innersuussutigineqarlutik. Aningaasaqarnermut Ataatsimiititaliamit naatsorsutigineqarpoq ilanngussat taakku aningaasaliissuteqarnissamik qinnuteqaammut ilanngussaq 1a aamma 1b assigigaa. Tunitsivinnut arlalinnut missingersuutit kisitsisitaat ilimagisallu arlallit ilanngussaq 1a-mi aamma 1b-mi allassimapput. Tunisassiorfiit qulingiluat § 1, imm. 2-mi taaneqartut ilanngussaq 1a-mi kisimik taaneqarput. Tamatuma saniatigut ilanngussaq 1b-mi tunitsiviit qulingat Maniitsumiittoq 2009-mi ilanngaattissat ilanngaatigereerlugit -2,248.789 kr.-inik amigartooruteqartussatut naatsorsutigineqartoq taaneqarpoq. Tamanna missingersuutillu kisitsisitaat allat tupinnaannartumik eqqoqqissaartut nalunaarsorneqarsimapput, taamaattumillu missingersuutit kisitsisitaat atorneqareersut siumut naatsorsorlugit atoqqinneqarsimanerannik ilimaginnineq tunngavissinneqarsorinarluni.

Taamaalilluni tunitsiviit sorliit kiffartuussinissamik isumaqatigiissummi ilaanersut ilisimaneqanngitsoq Aningaasaqarnermut Ataatsimiititaliap paasivaa! Aammattaaq kiffartuussinissamik isumaqatigiissummut akiliutissatut siunnersutigineqartup naatsorsorneqarnerani Maniitsumi tunitsivimmi aningaasartuutit qanoq qanorlu annertutigisumik ilanngunneqarsimanersut ersarinngilaq.

Tamanna **naapertuutinnngilluinnartutut** Aningaasaqarnermut Ataatsimiititaliamit isumaqatigiittumit igineqarpoq! Kiffartuussinissamik isumaqatigiissummut ilanngussanik ilanngussinissaq pisariaqartutut isigineqassappat tunitsiviit kiffartuussinissamik isumaqatigiissummi ilaatinneqartut ilanngussani kisimik innersuussutiginnissaat isumaqatigiissutip atsiorneqannginnerani qulakkeerneqassasoq ataatsimiititaliamit **tunngavissaatinneqarpoq**.

Aningaasaqarnermut Ataatsimiititaliamut inassuteqaammi ilanngussat taaneqartut innersuussutigineqarnerata tamatuma pingaaruteqarnera erseqqissaqqiinnarpaa.

8. Royal Greenlandip nunaqarfinni tunitsiviinut pisortat tapiissuteqartassappat?

Nunaqarfinni tunitsivinnut Royal Greenlandip Arctic Green Fooditoqqamit (Nuka A/S-iusimasumit) siusinnerusukkut tigusaanut tapiissuteqartarnissamut periarfissaq suleqatigiissitaliaq aqputigalugu misissorneqartoq qinnuteqaammi allassimavoq. Royal Greenlandip tunitsiviinut tapiissuteqarnissaq siunertaralugu ilassutitut aningaasaliissuteqarnissamik qinnuteqaat AGF-ip tunisassiorfiinut aningaasaliissutitut immikkoortinneqartunit avissaartissimaneqassasoq Aningaasaqarnermut Ataatsimiititaliap ersarissumik qinnutigissavaa. Taamaaliornikkut Royal Greenlandimut tapiissutit AGF-ip tunitsiviinut aningaasaliissutit amerlineqarnissaannut iluaqutitut atorneqannginnissaasa qulakkeernissaa ataatsimiititaliamit kissaatigineqarpoq.

Aamma Royal Greenlandip tunitsivii pillugit ilassutitut aningaasaliissuteqarnissamik qinnuteqaammik Naalakkersuisut nassiussilersaarpat tunitsiviit ataasiakkaat Royal Greenlandimut siumut naatsorsuutigineqariinngitsunik qanoq aningaasartuuteqaataasimanersut qinnutaammi immikkut nassuiaatigineqassasoq Aningaasaqarnermut Ataatsimiititaliamit naatsorsuutigineqarpoq. Taamaattoqassappat missingersuusiornermut inatsimmi aalajangersakkat naapertorlugit qinnuteqaat taamaattoq soq siumut naatsorsuutigineqareersinnaanngitsutut isigineqarner-soq erseqqissumik nassuarneqartariaqarpoq.

Aningaasaqarnermut Ataatsimiititaliap aalajangiinera

Uku tunngavissaatillugit Naalakkersuisunit inassuteqaatit Aningaasaqarnermut Ataatsimiititaliamit **akuerineqarput:**

- a.** Kiffartuussinissamik isumaqatigiissummi kukkunerit amigaatillu immikkoortoq nr. 7-imi aamma 7.1-imi tikkuarneqartut atsiortoqannginnerani iluarsineqassasut.
- b.** Atortussat kissaatigineqartut apeqqutinullu matuma siuliani allassimasunut akissutit ullumimit sapaatip akunneri pingasut qaangiutsinnagit kalaallisut qallunaatullu Aningaasaqarnermut Ataatsimiititaliamit tiguneqareersimassasut, nuutinnerallu elektroniskiusumik uunga nassiunneqassasoq nch@gh.gl.
- c.** Aningaasaqarnermut Ataatsimiititaliap oqaaseqaataasa ataanni apeqqutit amigaatillu taaneqartut kiffartuussinissamik AGF-imut isumaqatigiissutit akuerineqarnissaanik Naalakkersuisut tullianik qinnuteqaataanni ersarilluinnartumik ilanngunneqarsimassapput.
- d.** Kiffartuussinissamik isumaqatigiissutit atsiorneqartup nuutinnera Aningaasaqarnermut Ataatsimiititaliamut ingerlaannartumik nassiunneqassasoq.

Inussiarnersumik inuullaqqusillunga

Augusta Salling
Aningaasaqarnermut Ataatsimiititaliami siulittaasoq